

Gulaskuddanreive: Gulaskuddan – Plána sámi luossabivdokultuvrra sealluheapmái

Sámediggi ja Dálkkádat- ja birasdepartemeanta bovdejit sámi servodaga searvat gulaskuddamii doaibmabijuid birra sealluhit ja joatkit sámi luossabivdokultuvrra.

Duogáš

Sámediggeráđđi ja Ráđđehus leat soahpan hábmet oktasaš plána sámi luossabivdokultuvrra sealluheapmái. Plána duogážiin lea ahte luossabivdu lea maŋimus jagiid njiedjan garrasit sihke jogain ja mearas, ja das leat váikkuhusat árbevirolaš sámi luossabivdokultuvrra doaimmaheapmái ja sihke giela ja árbedieđu gaskkusteapmái boahtte buvvi. Sámediggi ja Dálkkádat- ja birasdepartemeanta háliidit dál cealkámušaid plánabargui.

Gažaldagat maidda Sámediggi ja Dálkkádat- ja birasdepartemeanta háliidit vástádusaid

Plána vuolggasadjin lea ahte luossabivdu lea dehálaš oassi sámi kultuvrra luondduvuđđosis. Vuodđun lea dárbu hálldašit luossamáddodagaid guoddevaš vuogi mielde, muhto oassin plánabarggus galgá árvvoštallot sáhtta go lágidit hálldašeami nu ahte dat buorebut sealluha sámi luossabivdokultuvrra.

Sámediggi ja Dálkkádat- ja birasdepartemeanta háliidit vástádusaid dáidda gažaldagaide:

1. Mo berre sealluhit, nannet ja joatkit sámi luossabivdokultuvrra, dás maiddá:
 - a. luossabivddu árbevirolaš doaimmaheami, dás maiddá teknihkalaš gálggaid, vugiid, árbevieruid, dábiid ja oahpahanvugiid?
 - b. árbedieđu luosa, luossabivddu ja luosa eallinguovlluid birra?
 - c. sámegeildoahpagiid luosa ja luossabivddu birra, oktan báikenamaiguin ja luonddu ja jagiáiggiid válddahemiiguin?
 - d. vuoiŋŋalaš doaimmaid luossabivddu oktavuodas, ovdamearkka dihtii bálvvosbáikkiid árvvusatnima ja geavaheami?
 - e. báikkálaš historjjá, máidnasiid, njálmmálaš máinnastanvieruid ja luđiid mat čatnasit luossabivdui?
 - f. duoji, borramušvieruid ja eará kultuvrralaš geavadiid ja ealáhusaid mat vulget luossabivddus?
 - g. eará árvvuid, geavadiid dahje árbevieruid mat gullet birgejupmái daid guovlluin gos lea ja leamaš sámi luossabivdu?
2. Mo berre buhttet daid negatiiva váikkuhusaid maid luossabivddu njiedjan lea dagahan olbmuid ekonomalaš dillái, sosiála eallimii, fierpmádagaide ja ássanmoksii daid sámi guovlluin gos luossabivdu lea leamaš vuodđun ássamii?

Mo searvat gulaskuddamii?

Buohkat sáhttet addit cealkámušaid. Čálalaš gulaskuddancealkámušaid galgá sáddet Sámedikki neahttasiiddu skovi bokte. Gulaskuddanáigemearri: juovlamánu 31. b. 2025.

Eanet dieđut leat dáppe: <https://sametinget.no/politikk/horinger/aktive-horinger/>

Jus it sáhte geavahit digitála skovi, de sáhtát sáddet gulaskuddanvástádusat poasttas.

Sámediggi –Sametinget
Poastaboksa 3
9735 Kárášjohka/Karasjok

Gulaskuddancealkámušat leat almmolaččat almmolašlága vuodul ja almmuhuvvojit deike:
sametinget.no.